

Litaba leqephe la 5

**Nkhabu o
khoaholla
mofao**



**Vodacom e
khutlisetsa
sechabeng**

7



Litaba leqephe la 8

**'Muso o qhele-
la mekhatlo
thoko**

A lokisetse Morena Sechaba se phethehileng (Luka 1,17)

MOELETSI oa BASOTHO

SELEMO SA 91-4515-16

www.moeletsoabasotho.co.ls

24-31 Tšitoe 2023



3

**"MOPAPA O LUMELLETSE BAPRISTA
HO HLOHONOLOFATSA LENYALO LA
BATHO BA BOLENG BO LE BONG"**

CHRISTMAS TIME

www.moeletsoabasotho.co.ls

Best wishes and jubilant



MOELETSI OA BASOTHO

Moeletsi oa Basotho o lakaletsa
bohle Keresemese e monate
le Mahlohonolo a Selemo se secha

www.moeletsoabasotho.co.ls

P.O Box 18, Mazenod 160

Tel: +266 28350466/62600983 WhatsApp
Email: newsroom@moeletsoabasotho.co.ls

0 606110 240390

MOELETSI

Basotho ba eletsoa ho tsetela

Lefu la ho se bale

Nthabeleng Seitlheko

Sechaba se seng le se seng se latela mekhoha le meetlo ho latela hore na se phela kae tlasa maemo afe. Basotho joaloka ba Mafrika taba ea ho bala ha se ntho eo re e antseng letsoeleng, re kopana le lona nakong eo Manyesemane a fihlang har'a rona. Re nkile meetlo ea bona ra lahla ea rona, hoo re seng re shebana joang-joang re bile re bitsana ka mabitso ha motho a ntse a latela mekhoha le meetlo ea Basotho. Ntho e utloisang bohloko ke hore ha re qopitsa lintho tsohle re khetha tse itseng ebe qetellong re hlahella joaloka batho ba sa tsebeng seo ba se batlang.

Taba ea hore Ntate ea Halalelang o lumeletse hore baprista ba ka hlohonolofatsa lenyalo lipakeng tsa batho ba boleng bo tsoanang, e ne e sa lokela hore ebe e tsoentse batho hakaalo. Ntho e makatsang ka ho fetisisa le bane bao re lumelang hore ba holisitsoe ka ho bala ba ntse ba le lefifing. Ho na le tokomane e ntšitsoeng ke lefapha le ikarabellang Litabeng tsa Tumelo, e hlohonolofalitsoeng ke Mopapa Francis ka sebele. E'a fumaneha marang-rang hona moo lerata lena le leng hona teng, 'me e hlalositse litaba hantle. Ha ho moo e reng moprista a tiise kapa hona ho hlohonolofatsa lenyalo la batho ba boleng bo tsoanang.

Lefapha leo le ngotse le ipapisitse le se ileng sa ngoloa ke Ntate ea Halalelang ka khoeli ea Mphalane ngoahola mabapi le litlhohonolofatso. Ho na le mefuta e 'meli e qolloang ea tsona e leng tsa moetlo le lentsoe (liturgy) le tse amanang le mokhoa oa ho rapela (devotion). Karolo ena ea bobeli ke hona moo ho ileng ha eketsoa 'me ha kenyeletsoa bohle ba sa pheleng ho latela mekhoha ea boitsoaro ea Sekriste. Ka ho otloloha ho buoa ka batho ba likamanong tsa lerato ba le boleng bo tsoanang.

Kaha Kereke e ile ea tseba hore ho tla ba le pherekano le lipuo tse eseng tsa 'nete mabapi le tokomane ena, e lekile ho hlalosa ka mongolo o motelele se hlileng se boleloang moo. E hlakisa hore tlhohonolofatso e etsoang lipakeng tsa batho ba babeli e lokela e se be khahlanong le popo ea Morena Molimo. Kereke ha e na matla a ho hlohonolofatsa ho latela moetlo baratani mae-mong a sa tloaelehang kapa baratani ba boleng bo tsoanang.

Moprista a ka fana ka tlhohonolofatso bathong ba joalo haeba ba e kopile, 'me ketso eo e se amahanngoe le lenyalo ho hang, kaha ho sa sebelisoa le mantsoe a sebelisoang kabong ea Sakramente ea Lenyalo. E le ho qoba pherekano ketso ena e se etsetsoe meketjaneng ea sechaba kapa sohle se ka amanang le eona, ho se binoe, ho sebelisoa mantsoe kapa liaparo tse ka bontšang eka ho so ketekoa lenyalo. Moprista kamor'a tlhohonolofatso a ka lakaletsa e mong le e mong oa bona mahlohonolo bophelong e se kamano ea bona.

Kereke e lumela hore Morena Molimo o lakatsa ho bona e mong le e mong oa bana ba hae a sokolohile a bile a baketse libe tsa hae. Baratani bana ba boleng bo tsoanang ha se mekhele libopuoeng tsa Morena. Ha motho a kopa tlhohonolofatso o bontša pako le ho amohela hore oa fokola, ka hona o kopa matla le grasía ea Morena ho mo thusa ho phela ho latela melao ea Morena Molimo. Thuto ea Kereke mona e bontša hore Morena o re rata kaofela ha rona a sa khathalle hore na boitsoaro ba rona bo joang, re phela ho latela libeliso tsa sechaba kapa tsa hae. O rata hore bohle ba itekole 'me haeba ba khelohile ba khutle litseleng tseo ba amohela Morena lipelong tsa bona.

Makatholike a matle ha re ithuteng tsamaiso ea Kereke ea habo rona, re boele re bale litokomane. Ntho e monate ke hore lintho tsohle tse phatlalatsoang ke Kereke li behoa hohle hore bohle ba ipalle 'me ba rue tsebo. Ha re qobeng pherekano ea ho iphumana re khahloa ke none e feta ebe re lahla metheo e nepahetseng. Ha re phekoleng lefu lena la ho se bale hobane re tla hloka tsebo e tla re etsa lifofu tse tl'o qetella li tataisoa ke tse ling.

Ho bohlokoa hore batho ba shebe mekhoha ea tšebeliso ea chelete, ho e fumana, le botseteli e le ho hlola bofuma. Tsena li hlalositsoe ke setsebi litabeng tsa lichelete ebile e le mosebeletsi khoebong ea HLB Chartered Accountants, Robert Likhang puisanong le Koranta ka la 20 Tšitoe monongoaha.

motho o na le kamano le batho ba bang e leng se etsang hore motho a lelekise ho tsoana le bona, ke ka hoo batho ba etsang lintho tseo ba sa lokeleng ho li etsa, joaloka ho reka leha ho sa hloka hahale.

Are boholo ba mafutsana ba sebeletsa lintho tsa nako e khutšoanyane, empa barui ba sebeletsa lintho tsa nako e telele, ka hona batho ba laole tsel ea tšebeliso ea chelete ka ho reka litlhoko tsa mantlha e le ho lokisetsa bokamoso ba bana kapa ba malapa a bona. A re nako ena ke eo batsoali ba lokelang ho tsetela thutong ea bana, 'me ho

chelete, hobane ba tseba hore ke nako ea eona ea potoloho.

A bontša ho na le mefuta e 'meli ea batho, ba bang ke ba etsang chelete le ba e sebelisang. A eletsa Basotho ho sheba menyetla e teng ea ho etsa chelete nakong ena eo 'maraka e bulehileng.

O re batho ba ka sebelisa chelete ka tsela ea ho tsetela karolo ea 10% ea meputso ea bona e le ea nako e telele, 'me ba be le mohopolo oa ho bokella chelete sebakeng sa khoebo eseng lijo, ba ipolelle hore 10% e behelloa ka thoko e le ea ho arabela litlhoko ha tsietsi e ka hlaha kapa



Setsebi litabeng tsa lichelete, Robert Likhang.

H'a lelekella litaba tsa tšebeliso ea chelete nakong ena ea mafelo a selemo, o bontšitse hore

be le matsete ho bokella chelete sebakeng sa mathata le kholo ea lelapa.

Likhang o re ntho e makatsang ke hore ka nako ena ea matsatsi a phomolo ea Keresemese ke eo mafutsana a nkang matsatsi a phomolo, le hoja e le nako eo ho etsoang chelete ka eona. A re barui bona ba bula mabenkele ho bokella

ho eketsa letseteng.

O re ha ho na mokhoa oa hore moruo oa naha o ka holela baahi ba Lesotho, kaha Basotho ba sa utloisisi ka bohlokoa ba ho tsetela chelete ba itjella eona ba leballa bokamoso. A khothaletsa Basotho ho reka likhoebong tsa Basotho ba bang hore chelete e tsebe ho potoloha kapele matsohong a bona.

Contacts: +266 28350 466 / 6260 0983 (Whats app)
Email: moeletsioabasotho@gmail.com

MOELETSI oa BASOTHO
A LOKISETSE MORENA SECHABA SE PHETHELENG (LUKE 1:17)

Editorial

Lesoetsa Rakubutu (Editor)
(+266) 58490670 / 62031949
editor@moeletsioabasotho.co.ls

Lehlohonolo Mohale (Sub-editor)
(+266) 58 771 507 / 62 771 507
subeditor@moeletsioabasotho.co.ls

Advertising

Thabo Lesaona
(+266) 28 350 466/ sales@moeletsioabasotho.co.ls

Newsroom

Nthabeleng Seitlheko 57 665 038/ 68 216 721
nthabeleng.seitlako@moeletsioabasotho.co.ls

Tšeliso Thakholi (Sports) 58 540 853/ 63 480 404

newsroom@moeletsioabasotho.co.ls

Production Desk

'Mateele Liqa , Sr Canicia Nthunya

"Mopapa o lumeletse baprista ho hlohonolofatsa lenyalo la batho ba boleng bo le bong"

STAFF

Matsatsing a ho feta ho ile ha tuma marang-rang hore Ntate ea Halalelang o lumeletse baprista ba Kereke e Katholike ho hlohonolofatsa lenyalo la batho ba boleng bo tšoanang. Tsena li tšile kamor'a hore Lefapha la Thuto ea Tumelo le ntše Tokomane e bitsoang "Fiducia supplicans" eo Mopapa a e lumellaneng le eona ka la 18 Tšitoe monongoaha.

Sehloho sa tokomane ena se re "Bokhoni ba ho hlohonolofatsa baratani maemong a sa tloaelehang." Ho latela Leselinyana la Vatican News tokomane eo e hlalosa hore ho ka khonahala hore batho ba ratanang ba boleng bo tšoanang ba hlohonolofatsoe ntle le ho bontša kapa hona ho etsa moetlo oa lenyalo. Thuto ea Kereke mabapi le lenyalo ha e fetohile ebile le eona hlohonolofatso eo ha e bontše kamohelo ea kopano eo.

E le ho qoba pherekano e ka bakoang ke litaba tsena ho bile le tlhaloso e telele 'me re tla leka ho akaretisa tsohle.

Tokomane e kena ka bo-



tebo tabeng ea lihlohonolofatso, 'me e fana ka phapano lipakeng tsa tse amang meetlo le lentsoe (liturgy) le tse amang le mokhoa o itseng oa ho rapela (devotion). Ke hona karolong ena ea bobeli ho bang le khonahalo ea ho amohela ba sa pheleng ho latela melao ea boitšoarō ea Sekriste, ho hlohonolofatsoa ha ba kopa joalo.

E qala ka seleleka se entsoeng ke Mocardinal Victor Fernandez ea hlalosang hore tokomane e leka ho hlalosa moelelo oa tlhoho-

nolofatso, manoni a eona ho latela kutloisiso e hlakileng ka ho ea ka toro ea Mopapa Francis. Ke boinahano bo bontšang tsoelopele mabapi le se ileng sa boleloa ka lithohonolofatso ho fihlela ha joale, 'me ho fihla kutloisiso ea hore ho ka hlohonolofatsoa baratani maemong a sa tloaelehang 'moho le baratani ba boleng ba tšoanang ntle le ho netefatsa boleng ba likamano tsa bona kapa hona ho fetola thuto ea Kereke mabapi le lenyalo.

E tsoelapele ho bontša

hore ho bile le phetoho e entsoeng ho tloha seratsaoneng sa pele ho isa ho sa boraro tsa selemo sa 2021, 'me ha joale e se le liratsaona sa bone ho isa ho sa botšelela tse hlalosang lithapelo kapa meetlo e ka bakang pherekano lipakeng tsa se bontšang motheo oa lenyalo kapa ho khahlanong le ona. Ho baleha ka litsela tsohle sohle se ka etsang hore motho a lumele hore seo e seng lenyalo ke lenyalo, e hlakisa hore ho ea ka ea Thuto ea Kereke likamano lipakeng tsa mona le mosali ke tsona tse lumelloang lenyalong.

Haeba tlhohonolofatso e fuoa batho ba nang le likamano ho latela moetlo, Tokomane e hlalosa hore tlhohonolofatso e joalo e lokele ho lumellana le seo Molimo a se entseng tšimolohong (seratsoana sa 11). Ka hona Kereke ha e na matla a ho hlohonolofatsa ho latela moetlo baratani maemong a sa tloaelehang kapa baratani ba boleng bo tšoanang.

Kamor'a ho etsa lipatlisiso Mangolong a Halalelang mabapi le lithohonolofatso Tokomane e fana ka kutloisiso ho latela mosebetsi oa baprista. E hlalosa hore bohle ba kopang ho hlohonolofatsoa ba bontša hore ba na le tlhoko ea Morena Molimo bophelong ba bona, ho kopa tataiso ea hae ho phela bophelo ka mokhoa o lokileng (seratsoana sa 21). Kopo e joalo e ka amoheloa ho sa ikamahangoe le meetlo le tsamaiso ea tlhohonolofatso 'me ho na le tokoloho. (seratsoana sa 23)

Ha ho shejoa ho ea ka tloaelo tlhohonolofatso e ka nkoa e le ketso ea thapelo, ka hona ba e kopang ha

ba lokele ho ba boitšoarō bo hloekileng hore ba e fumane. Tokomane e ipapititse le Dubia ea Ntate ea Halalelang ea khoeli ea Mphalane isao, e buang ka tlhohonolofatso e koptjoang ke motho kapa batho 'me e sa be khahlanong le boleng ba lenyalo. Tlhohonolofatso e joalo e ka fuoa mang kapa mang ntle ho tšobotso e le ho bontša batho hore ke bana ba Morena ba hlohonolofalitsoeng le hoja ba e-na le liphoso. Hape Ntate ea Maholimong o lakatsa ho bona ba sokolohile 'me ba phela ka ho loka kamehla (seratsoana sa 27).

Motlotsuoa (ordained minister) a ka kena thapelong le batho ba joalo ntle le ho etsa meetlo efe kapa efe ea Kereke, le kopano eo ea bona e ke ke ea bapisoa le lenyalo ho hang. Empa bona ba lakatsa ho ipeha mohaung oa Morena, ho kopa thuso hore a ba tataisetse kutloisisong ea lerato le 'nete (seratsoana sa 30)

Le hoja ho hlohonolofatsoa baratani e se kamano ea bona, Tokomane e hlalosa hore tlhohonolofatso e lebisoa likamanong tsa batho ba babeli. Motlotsuoa kamor'a thapelo a ka lakaletsa motho ka mong khotso, bophelo bo bottle ba moea le hore khanya le matla a Morena Molimo li phethahatse thato ea hae ka ho phethahala (seratsoana sa 38).

E boetse e bontša hore e le ho baleha pherekano, tsena tsohle li se etsahale meketjaneng ea sechaba kapa ho ka amanang le tsona. Ho se be liaparo, mantsoe kapa liketso tse etsoang ha ho amoheloa Sakramente e Halalelang ea Lenyalo (seratsoana 39). Empa tsena li ka etsahala maemong a mang joaloka maetong a thapelo, ha ba kopana le moprista tseleng, thapelong e etsoang ka lihlopha. (seratsoana sa 40)

Qetellong (liratsoaneng tsa 42 ho isa ho 45) ho hlalosa hore leha likamano tsa motho le Morena Molimo li aparetsoe ke sebe a ka kopa ho hlohonolofatsoa, e le ho otlollela letsoho la hae ho Morena, 'me ho kopa tlhohonolofatso e ka ba ketso e ntle maemong a mang (seratsoana 43).

Etela link e latelang ho ipalla lintlha ka bottlalo **Doctrinal declaration opens possibility of blessing couples in irregular situations - Vatican News** **Vatican News**

DCEO e khoasolla masholu

Nthabeleng Seitlheko

Ele ho ntša bobolu ka metso litabeng tsa lichelete tsa maqheku, Setsi sa Toantšo ea Bobolu le Bomenemene (DCEO) se kene letšolong la ho potoloha le naha ho hlaloha na batho ba khollang maqheku ke ba nepahetseng. Tsena li boletsoe ke Ofisiri ea liphatalatso DCEO, 'Matlhokomelo Senoko, puisanong le Koranta ka la 21 Tšitoe monongoaha.

O re letšolo lena le qalileng ho sebetsa Maputsoe le Leribe le tla tsoelapele naha ka bophara, kaha ho hlokomelohile hore ho na le boqhekanyetsi bo ntseng bo etsoa ke marena le karolo e 'ngoe ea bahlanka ka ho kholla maqheku meputso ba se ba hlokaletse kapa bang ba ntse ba phela.

A re ho na le batho ba sebelisang marena hampe ka hore ba ba ngolle mangolo a bopaki ba ho kholla batho ba bang, 'me boholo ba batho ba oela kahar'a litaba tsena ka hona sechaba se

hlokomele 'moho le marena hore ba se sebelisoa hampe kaha ho le kotsi.

O re selemong sena sa 2023, ke bonyane linyeoe tse 15 tse sebelitsoeng, 'me ba thusoa ke batho ba ba fang menyenyetsi. A re seo ba se hlokometseng ke hore ba lokela ho anetsa thuto sechabeng hore batho ba utloisise hore boqhekanyetsi bo jele setsi haholo cheleteng.

A re ha e le mafelo a selemo batho ba etsa litlolo tsa molao tsa boqhekanyetsi, 'me bona ha ba thabele ho tšoara batho ka hoo ba ke ba leke ho tsoa kahar'a litlolo tsa molao.

A re ke hona letšolong le boletsoeng setsi se qhaulit-seng le ho qosa Morena Mareseng Mphuthing (42) oa Sebothoane, Ha Mphuthing ea qosoang ka ho etsetsa Mpele Moliboea (49) lengolo le ho mo tempela lona e le le sebelisoang ho utsoa chelete ea maqheku. Bobeli bona bo hlalosa e le karolo ea lequloana le utsoang chelete ea maqheku.

Qoso e hlalosa ha bobeli bona ka morero, ba ile ba

etsa 'momori oa ho kholla 'mangoane oa Moliboea eleng 'Masera Moliboea ea hlokaletse, 'me ba se ba jele chelete e balloang ho M27,900.00. Liphuphutso li utullotse ha 'Masera a ne a tlohe Lesotho lilemong tse mashome tse fetileng, 'me a ne a se a iphelela Afrika Boroa ho fihlela a timela ka selemo sa 2021.

Morena Mareseng o ne a ngolla Moliboea lengolo khoeli le khoeli moo a neng a mo paka hore a kholisoe chelete ea 'mangoan'ae eo ba neng ba re oa kula. Ba lokolotsoe ka bail ea M1,500.00 motho ka mong le ho batla motho ea phelang Leribe ea ka behang paneng thepa ea boleng ba M10,000.00.

H'a phethela o re boqhekanyetsi ba chelete bo tota haholo mafelo a selemo, joale bona ba sebetsana le bobolu boo batho ba bo rerang 'me lipatlisiso tsa bona li nka selemo. A ipiletsa ho batho khaotsa liketso tsena tse senyang chelete ea naha e ka sebelisoang lintlafatsong.

Bacha Keresemese ke eo!



Moeletsi oa Basotho o lakaletsa babali ba koranta Keresemese e monate le Mahlohonolo a Selemo se secha

boikarabello ba bona ntlheng ea boitšoaro. Bacha ba bangata ka nako ena ba fetoha mekhoheng le boitšoaronng boo ba tsejoang ka bona. Ba lahlehelo ke moelelo oa bophelo ba bona e le bacha, 'me ho hlakile hore ho ntse ho e-na le ba ntseng ba e-s'o utloisise bohlokoa ba letsatsi la Keresemese.

Liketso tseo ba li etsang ha se tse halaletsang letsatsi lena, 'me e ka sehlohong ke tšebeliso e mpe ea tai le lithetefatsi. Batsoali re kopa le re thuse ho loantša boemo bona. E 'ngoe e ngongorehisang batho ba bangata ke likotsi tsa mebileng tse atisang ho phahama haholo ka Keresemese ka lebaka la bacha ba khanang ka bohlasoa.

Litlhekefetso lia phahama le bokhachane bo sa reroang kahare ho bacha, empa e malimabe ka ho fetisisa ka letsatsi leo bacha ba bangata ba nyamella batsoali ba bona, ba ikela maratong a lipelo tsa bona. Hobaneng bacha le etsa joalo? Liketso tsena le tse ling, li silafatsa letsatsi lena la tsoalo ea Morena Jesu Kriste. Keresemeseng ena ha re fetoheng bacha ba kajeno le kamoso, ba tla tsoela kereke le naha ea habo bona molemo.

Tšeliso Thakholi

Kajeno bacha ba heso, ke lakalitse hore re ke re tl'obua le lona ka Keresemese. Hantle Keresemese ke'ng? E qalile joang? Ho ea ka tthaloso ea lingolieng ho tloha ka selemo sa 400AD, bakriste bohle lefatše ka bophara hae-sale ba ketekela Tsoalo ea Jesu Kriste, 'me e tlotlisoa ka phano ea limpho ho batho. E tšoana hantle le eo ba bohlale ba bochabela, nakong eo ba neng ba etetse lesea Jesu ba neng ba etse, e leng ea ho fana ka limpho ho eena.

E leng hore litaba tsa Keresemese li hlaha ka-

hare ho buka ea Bibe. Li hlaha haholo ho Mattheus 2:7 le Luka 1, 18-24 e leng moo ho hlalosoang tsoalo ea Jesu Kriste ka botlalo. Ha re ntse re tsoelapele ho hlalosa Keresemese re li bona tjena mohaeso:

Keresemese ke letsatsi leo ka lona malapa ohle a teteang 'moho, e le ho tla keteka tsoalo ea Morena Jesu Kriste. Ke letsatsi la thapelo, moo bacha ba bakriste ba tšoanetseng ho bontša ka liketso tsa mohau, bokriste ba bona, haholo ho bacha ba hlohang.

Ho na le bacha ba bangata ba re pota-potileng, ba hlohang thuso le tšehetso ea rona, 'me Keresemese ke monyetla o motle oa hore ba ka atlehang, ba nana-beletsa letsoho ho ba

se nang hona. Ke lona letsatsi lena moo bacha ba lokelang ho nehelana ka limpho ho ba bang ba bileng le tšusumetso ho bona bolelelehang ba selemo.

Empa bacha ba heso, ha le ntse le fana ka limpho, se lebaleng bacha ba fumanehang Litsing tsa Tlhabollo ea Batšoaruoa, lipetlele, mapatlelong a literopo tsa Lesotho le mahaang a likhutsana. Libakeng tsena ke bacha ba se nang letho, 'me ba hlohang ho fua limpho. E le hore Keresemese ena e ke e tlise liphetho bophelong ba bona, 'me liketso tsa mohau, tseo le ka ba etsang tsona, ba ke ke ba li lebala, 'me ho tseba mang, ba ka u buseletsa nakong eo bophelo bo seng bo fokola.

Ka lehlakoreng le leng Keresemese hangata e na le ho lebatsa bacha



'Muso o hloka kutloisiso

Nthabeleng Seithleko

Moetapele oa Lekhotla la Tumelo ea Basotho (YES) Molefi Ntšonyana o re puso ea sechaba ka sechaba ke tsamaiso e hloekileng e itšetlehileng ka bolokohi ba batho bohle litabeng tse ba amang. Tsena o li boletse, puisanong le koranta ka la 20 Tšitoe monongoaha.

O re e fa motho bolokolohi ba puo le ho ba kahar'a mekhatlo ho sa natsoe mofuta ea eona e le hore motho a be le lentsoe litabeng tse mo amang, e boela e fana ka matla hore batho ba ikhethetele baemeli ba bona paramenteng, ho bona hore ba lisa tšebeliso ea lichelete tsa sechaba, ho li aba le ho etsa melao.

A re hona joale Litsi tsa Tšireletso ha li hlomphe litšia tsa puso ea sechaba ka sechaba kaha li se li supisa maparamente tsela ea tšebetso, 'me taba eo ea tšosa ebile e fosahetse. A re mosebetsi oa maparamente ke ho ikhethela Tona-Kholo, ha eona e na le matla a ho ikhethela matona a tšepeloang ho etsa mosebetsi.

A re puso ea sechaba ka sechaba e tsamaisoa ka maoto a mararo moo maparamente a etsang molao, 'me esale puso ena e bonahetse e etsa litšoso litabeng tsa puso ea sechaba ka sechaba ka ho sebelisa Litsi tsa Tšireletso hampe. A re 'democracy' e lokela e be seikokotlelo kaha ho le molemong oa naha.

Ntšonyana o supile ha 'muso o teng e le oa batho ba sa utloisiseng litaba tsa tsamaiso ea puso ea sechaba ka sechaba le matla a eona, le maparamente ha utloisise mosebetsi oa bona. A re ho bonahala ba na le khaello ea tsamaiso ea litaba tsa bona e le paramente hobane ba sa utloisise matla a bona, 'me bopaki ke ba Mhlophhehi Pusetso Lejone ea ileng a kenya qoso Lekhotleng la Molao oa Motheo ka litaba tsa ho theoloa ha Tona-Kholo pu-



song empa maparamente a lumelloa ke molao ho etsa joalo. O re Tona-Kholo o

rata ho hauheloa ke sechaba le ho sebelisa Litsi tsa Tšireletso ho mo loanela

ntoeng ea lipolotiki e mo amang kahar'a paramente.

A re ba ke ke ba tlohela

taba ena fela e le bapolotiki, 'me ntlha e 'ngoe ke litaba tsa tlhopho-bocha tseo ho sa thoeng letho ka tsona. A re le bacha ba ileng ba etsa mokoloko oa hore ba rata ho sireletsa tlhopho-bocha ho ne ho se joalo ba ne ba sireletsa puso. A re ketsahalo tsa mofuta ona qetel-long li tla ama puso ka hore khakanyo ea lichelete e tla sitoa ho feta ka khoeli ea Tlhakubele 2024, 'muso o ntse o ka fetoha kapa naha ea leba likhethong.

A re ho hlorisoa ha maparamente a bohanyet-si pusong ena ho t'lo ama tlhopho-bocha hobane ho na le lipalo tse hlokalang hore ho tle ho fetisoe melao, e bang ba 'muso ba sa buisane le ho lokisa litaba le mahlakore a amehang seo se tlo ama tlhopho-bocha le hoja e le ntlha e ka sehlo-hong e ka lokisang tse ling tsa tsamaiso ea naha.

Nkhabu o khoaholla mofao

Nthabeleng Seithleko

Basali ba lokela ho ema ka matla litabeng tsa lipolotiki le ho tšehetsana boetapeleng hore ba tsebe ho ba le lentsoe litabeng tsa tsamaiso. Tsena li boletsoe ke Molula-Setulo oa Thaka e Ncha ea Mokha oa Sechaba sa Basotho (BNP) Molihi Nkhabu, puisanong le koranta ka la 20 Tšitoe monongoaha, a khoaholla tsa leeto la matsatsi a mararo leo a bileng ho lona, 'mokeng oa basali ba ntseng ba thuthuha tsamaisong tse fapakaneng, o bileng Naheng ea Tanzania.

O re sepheo sa 'moka ona e ne e le ho thakelana ka malebela e le basali litabeng tsa tsamaiso, ho matlafatsana le hore na ke lintho life tseo ba lokelang ho li hlokomela ha e le baetapele. A re lebaka le leng ke ho thusa basali ba ntseng ba le tsamaisong hore ba tsitse litabeng tsa boetapele le ho ba le boikemelo molemong oa boetapele bo nang le ponaletso le tsoelopele.

A bontša hore har'a litaba tse tšohliloeng 'mokeng ona ke tsa ho shebana le tšireletseho ea basali boetapeleng, tekano, thu-

to ea lipolotiki le hore na basali ba lokela ho nka boikarabelo joang litabeng tsa tsamaiso. O re e le mocha litabeng tsa lipolotiki o ithut-ile hore basali ba lokela ho tšehetsana, ba hlomphe

O bile a etsa khoelehetso ho basali bohle le ba baphatlalatsi hore Lesotho le emloe ka mekhahlelo eohle kahara 'moka oo hore ba tsebe ho ba karolo ea liqeto tse fihleloang ke

bo ba sa fumane mesebetsi e joalo. A re ke nako ea hore basali ba fetohle lipolotiking ba be ntsoe leng, ba tle ka maano a ba kopanyang, ho ba fa boitšepo le ho tšehetsana.



le ho eletsana ka matla e le hore boetapeleng ba bona mafapheng ohle ho be le tsoelopele.

Ke hona moo ba fumaneng hore ntho e bakang ts'itiso tsoelapeleng ea basali ke tlala le boikarabelo bo tjamelang basali ba bangata ba sa le tlase lilemong 'me seo se etsa hore bacha ba bangata ba hloke mamello le tsoelopele litabeng tsa lipolotiki.

basali ba linaha tse ling. A re esale BNP e ela hloko bohlokoa ba basali litabang tsa tsamaiso hobane ke mocha oa bobeli oa mosali ea etellang bacha pele ha mongoli-kakaretso e le mosali lekhetlo la pele.

O re ntho e etsang hore ebe Naha ea Lesotho e boemong bona bo thata ke hobane batho ba fuoa maemo a mosebetsi a sa ba lumeleng, empa ba nang le litse-

H'a phethela o re ke toro ea hae kamor'a ho khutla 'mokeng ona ho tla kopanya basali bohle haholo ba teng lipolotiking hore ba utloisise boikarabelo ba bona litabeng tsa tsamaiso le litabeng tsohle tse amang naha. O re o bone ho le bohlokoa hore a khothalese basali ba Basotho ka mekhahlelo eohle ea boetapele ho ikopanya ho hlola liqholotso tsohle tse ba tobileng.

Letsoai le bolaea likokoana-hloko-Posholi

Nthabeleng Seithleko

Basotho ba lokela ho fetola mekhoha ea bona ea ho hlapa ka ho tšela letsoai metsing ho bolaea likokoana-hloko tse ka amang letlalo. Tsena li boletsoe ke Mothehi oa Khoebo e hlahisang Litlolo tsa Letlalo le Meriri (MyCare Fragrance) Nthabiseng Moloantoa Posholi, puisanong le koranta, ka la 20 Tšitoe monongoaha.

A re bohlokoa ba ho se-



belisa matsoai ke hore a thusa ho hloekisa metsi kaha a e-na le likokoana-hloko, tse ka bakang komello le mofetše oa letlalo.

A re letsoai le ka thusa ho ntšha litsila tse sa hlokaleng 'meleng tse ka bakoang ke ho se je hantle, ho itlotsa ka lintho tse nang le lichefo, ho tliša mongobo letlalong, ho khatholla 'mele, ho theola khatello ea maikutlo, ho felisa serame sa masapo ka ho inela maoto kahar'a metsi, ho fokotsa botsofali ba sekhahla, ho thusa bohlokong ba mesifa, phallo ea mali e nepahetseng le bothata ba hlooho.

O re Basotho ha ba eelloe lintho tse ka ba bakelang mathata bophelong, leha ba leka hore ba ka thusoa ho tlohela litloaelo tsa bona e ba bothata, kaha tse ling tsa litlolo li fana ka bothata kamor'a nako e itseng letlalong. A bontša ha batho ba sebelisa metsi a manyane ho ithatsoa ha ba lokela ho sebelisa a mangata ho ntšha litsila le lichefo 'meleng.

A re motho o lokela ho ipulisa ka metsi ha qeta ho hlapa ho ntšha lichefu tse bakoang ke lisepa, hape hore motho a utlooe 'mele o thapolohile ka matsatsi ohle a inele maoto ka metsing a letsoai, kaha le kena hantle, 'me hoo ho thusa le borokong bo botle.

A re ba khothaletsa batho hore ha ba longoa ba tsoelepele ho sebelisa letsoai empa le lekaneng hantle, ba se ke ba ingoaea, ba iphaphathe kaha ho ingoaea ho bula masoba a 'mele. A re ba boetse ba na le matsoai a se nang monko ho thusa sebakeng sa batho ba hlohoang ke monko.

Posholi o re matsoai ana a sebelisoa ho tloha ka ngoana ea nang le selemo, empa ba khothaletsa haholo batho ba seng ba holile hobane ba bang ba sitoa ho tsamaea hobane mesifa e

sa sebetse hantle, lebaka ke hore batho ba baholo masapo a bona a se a na le bothata, 'me ba opeloa ke maoto le ho ba le khatello ea maikutlo.

A re batho ba bangata ha ba eelloe bohlokoa ba hore bophelo bo botle ke ho hlapa ka tsela e nepahetseng hobane lichefo tse bakoang ke litlolo li kena letlalong ka 60% ebe 40% li ba kantle, 'me ha batho ba sa hlape ka tsela e nepahetseng ba fepela letlalo kahare ka lichefu, hoo e ka reng ha li hlahella letlalo la bonahala ka makhopho, komello e kholo, chubaba le ho foforeha.

H'a phethela o hlahositse hore Basotho ba na le litlolo tse se nang litlamorao, 'me bona ba fana ka thuto khafetsa ka bohlokoa ba ho hlokomela letlalo hobane ke lona le fanang ka boitšepo ho motho.



Mothehi oa Khoebo e hlahisang Litlolo tsa Letlalo le Meriri (MyCare Fragrance) Nthabiseng Moloantoa Posholi.

MyCare Fragrance ke ipapisitsoe le mofuta oa khoebo e thehiloeng ka selemo sa 2021, 'me lebitso la eona le thehiloe ho

lilolo tse hlahisoang ke khoebo ena tsa letlalo le lijo-tlatsetso.

Bacha ba khothaletsoa ho sebelisa bahlabolli

Nthabeleng Seithleko

Tlhabollo ha se litšebeliso tsa batho ba baholo feela ka hona bacha ba nke boikarabello ba ho etela bahlabolli litsing tsa bophelo le tse ikemetseng, ho fumana likeletso ka litaba tsa bophelo ho qoba ho ipolaea le

ho senya bophelo ba bona ka tšebeliso ea lithetefatsi. Tsena li boletsoe ke Mohlabolli Tlou Ignatius Maime, puisanong le koranta, ka la 20 Tšitoe monongoaha.

O re boholo ba bacha ba bonahala ba e-na le khatello ea maikutlo matsatsing ana, e bakoang ke tlhokahalo ea mesebetsi kaha boholo baithuti ha ba qeta



Mohlabolli Tlou Ignatius Maime

ho phethela lithuto tsa bona ha ba fumane mesebetsi ba sitoa le ho ithehela likhoebo. A re bacha ba bang ba leka ho itšunyelletsa kahare ho lintho tse ba sa li khoneng ka ho etsa likoloto tseo motho a sa atleheng ho li lefa.

A re bacha ba bonahala ba hlekefetsana marang-rang ka ho nyefola linepe tsa ba bang, 'me ba qetella ba e-ba le khatello ea maikutlo hoo motho a qetella a ipolaea. A re matšoao ao motho a ka hlokomeloang ka ona hore o na le khatello ea maikutlo, ke ho itematsa ka ho seha linama tsa hae, ho phela sebakeng a le mong, ho noa lithlare ka palo e fetang tekanyo ea ngaka, ho fetola metsamano le ho se amohele lintho tseo batho ba lekanang ho li etsa tse ntle e le tšehetso.

Maime o re batho ba bang ba bonahala ka tšebeliso e holimo ea lithetefatsi hoo e reng ha motho a sa khone ho fihlela maemo a itseng a bophelo, a nke bophelo ba hae kapa a qetelle a senyet-sa batho. O re khatello ea maikutlo e kotsi ho mang le mang, 'me motho a ka e

hlola ka ho arolelana litaba le batho bao a ba tšepang, kapa ho ea setsing a kopana le mohlabolli, ho qoqa le moruti kerekeng le ho kenella kahar'a boikopanyo le bacha ba bang lipapaling kapa mekhatlong.

A re nakong ena ea mafelo a selemo batho ba lokela ho se ipehe tlasa khatello ea ho etsa lintho tse ba sa li khoneng, ba hopole monate oa hona joale ke oa nakoana, 'me bacha ba nahane ka bophelo bo bacha le ho intlafatsa. A re o tšoenyehile e le mocha oa mohlabolli ke kamoo bacha ba nkang bophelo ba bona ka teng, ka hoo bohle ba lokela ho nka boikarabello ba ee ho bahlabolli ho sebetšana le liqholotso tse ba tobileng bophelong.

H'a phethela o supile hore ha ho na bophelo bo bonolo ka hona batho ba tsebe hore ho na le metheo le moepa eo motho a lokelang ho tsamaea kapa ho feta ho eona ho fihlela toro ea hae, ka lebaka leo bacha ba se bapise bophelo ba bona le ba bang, ba lule litorong tsa bona ho fihlela ba tsoeella bokamosong ba bona.

Vodacom Foundation e khutlisetsa sechabeng

Nthabeleng Seitlheko

Vodacom Lesotho Foundation e khutlisetsa sechabeng ka ho phallela bahloki le batho ba tlokotsing ba 120 ka liphutheloana tsa lijo, Thaba-Bosiu, ka la 20 Tšitoe monongoaha.

Ofisiri e Kholo Lefapheng la ho Khutlisetsa Sechabeng Vodacom, Pinki Manong, o hlalositse hore sepheo sa phano eo ke ho khutlisetsa sechabeng e le ho leboha tšehetso ea kamehla eo Basotho ba e fang Vodacom Lesotho.

A re e le Vodacom Foundation ba tšehetsa merero e mengata e reretsoeng ho ntlafatsa bophelo, thuto, tekano, polokeho ea sechaba le tse ling tse ngata. O re ba etsa sena ho matlafatsa sechaba hore se tsebe ho ikemela liqholotsong tse fapakaneng.

A bontša hore tthekefetso ea basali le bana ke e 'ngoe ea lintho tse ba tšoentseng haholo 'me o qholotsa sechaba ho loantša kholumo-lumo eo ka ho thibela litloaelo le meetlo e khotlaetsang tthekefetso.

Lebitsong la Morena oa Sehlooho oa Thaba-Bosiu, Morena Leloko Mohalenyane o lebohile Vodacom Lesotho ho tsoa botebong ba pelo ea hae. A re

likhutsana le bahlolohali ke boikarabello ba marena 'me ha ba se na bahlokomeli ba fetoha lefela. A re boikarabello boo bo ba boima kaha marena a se na chelete, ke ka lebaka lena Vodacom e otlolotseng letsoho ho thusa

hore le bona ba natefeloe ke Keresemese joaloka ba bang.

O ipilelitse ho bohle ho nena tthekefetso ka mefuta eohle ho kenyeletsa ea ho amoha likhutsana le bahlolohali mafa le bophelelo.

Liphallelo li hakanyetsoa ho M50, 000. 00, tse fuoeng batho ho tsoa metseng e robeli ea tikoloho eo. Vodacom Lesotho Foundation ke boikemisetso ba eona ba ho thusetsa tlokotsing le ho sebetsa le sechaba ho fumana tharolo

lo ea moshoelella liqholotsong tseo se kopanang le tsona letsatsi le letsatsi.

Phano ena e latela hore ka la 16 khoeling e holimo Vodacom Lesotho e tšoare mokete oa eona oa selemo le selemo oa All White Thaba-Bosiu.



Ofisiri Lefapheng la ho khutlisetsa sechabeng, Pinki Manong ha aba limpho.

Tšelisong Thakholi

Baemeli ba Mokhatlo oa Machaba oa Bafalli(IOM), ho tsoa linaheng tse 12 tsa litikoloho tse fapakaneng tsa lefatše, ba ketekile Letsatsi la Machaba la Bafalli, tlasa mohoo o reng; 'ho hlompha menehelo ea bafalli le litokelo tsa bona'. Ketekelo ea letsatsi lena e bile Lancers Inn, Maseru ka la 18 Tšitsoe monongoaha.

H'a fana ka puo ketekelong ena, Letona la Puso ea Libaka, Borena, Lita-

IOM e keteka Letsatsi la Bafalli

ba tsa Lehae le Sepole-sa, Mohlomphehi Lebona Lephema o re bofalli ke sebetsa se matla haholo, bakeng sa ho ntlafatsa mekhoha ea boipheliso ea malapa a bafalli a fetang limillione, lichabeng tseo ba phelang le tsona ho potoloha le lefatše ka bophara. A bontša hore Naha ea Lesotho joaloka ha e amohela batho ba tsoang linaheng tse ling, e ntse e ikemiselitse ho netefatsa hore bafalli ba fumana tšireletso e phethahetseng.

"E le hona ho matlafatsa tšireletso ena, re ntse re tsoelapele ho ntlafatsa leano la ronala bofalli le meralo, e le hore re tle re

tsebe ho amohela bafalli ba ratang hoba bajaki ba Lesotho". O boletse joalo a bile a eketsa ka hore bafalli ba bangata ba falla ntle le boikhethelelo ba bona, 'me ba kenya letsoho le toma kholisong ea moruo, ba fokotsa ho se lekane ha batho le ho kopanya lichaba tse fapakaneng. "Ba bang bona ba falla hobane ba batla ho pholosa bophelelo ba bona kotsing, 'me ka bomalimabe ba siea malapa a bona linaheng tseo ba tsoang ho tsona." A rialo.

A re le ha ba etse hloko hore bafalli ba falla ka mokhoa o sireletsehang le o lao lehang, ba bang ba tobane le maemo a thata

a litšoso le litšokelo bophelong ba bona ba letsatsi ka leng. A re ba boetse ba hlokometse hore ba bang ba rekisoa ka sekhukhu ka mokhoa oa thekiset-sano ea batho. A qetella ka hore 'muso oa Lesotho o ikemiselitse ho tsoelapele ho sebetsa 'moho le mekhatlo ea machaba ea bafalli le Basotho ka kakaretso ho khotlaetsa bofalli bo laolang hantle le ho sireletsa litokelo tsa bafalli 'moho le thibelo ea thekiset-sano ea batho.

Mohokahanyi oa UN, Mofumahali Amanda Khozi Mukwashi o itse malapa mangata a tobane le qholotso e kholo ea likarohano

le ho senyeha ha likamano tse mofuthu tsa malapa ka lebaka la bofalli. A re bofalli bo boetse bo tlisa liphetoho kahare ho sechaba, litlaelong tsa sona tsa bochaba le bonngoe. A thoholetsa bafalli ba Lesotho ka hore ba ke ntse letsoho le toma lintlafatsong kahare ho naha le ho jara lefa le leholo la ho tseba mekhoha le meetlo ea Basotho.

Letsatsi la bofalli le ketekoa selemo le selemo ka morero oa ho tlotla bafalli, ba e tsang lintlafatso linaheng tseo ba kopileng botšebli ho tsona. Le boetse hape le tšoauoa e le fana ka monyetla oa hore sechaba se ele hloko mesebetsi eo bafalli ba e etsang lefatše ka bophara.

'Muso o qhelela mekhatlo thoko

Nthabeleng Seitlheko

Mohokahanyi Mokhatlong oa Lihoai Farmers Pitso Tlaba Mochebelele, o re ba tsoere ka matla ho ntlafatsa lihoai, ho li hokahanya le ho tsebahatsa tlhahiso e teng kahare ho naha ho e hlahisa sechabeng e le boiphihlelo ba Basotho temong. O boletse tsena, puisanong le koranta ka la 20 Tšitoe monongoaha.

O re sena ba se etsa ka ho tsoarela lihoai mokete oa lipontšuo tsa lihlahisoa tsa bona, moo ba memang litsebi, bahoebi le boralikhoebobane hore ba tsebe ho khahloa ke lihlahisoa tsa Basotho. Morero o moholo ke ho bula mamati a mebaraka, ho tlisa bophelo kahar'a temo le hore lihoai li hlahise ka bongata e le ho fetola temo khoebo.

Mochebelele o re ka la 1 ho isa la 2 Tlhakubele isao, ba tla bula selemo ka matla, moo ho tla ba le mokete oa lipontšuo o tla tsoareloa lihoai tsohle kahar'a naha,

Seterekeng sa Maseru e le ho bula menyetla eohle ea temo ho lihoai. A re mosebetsi ona o tlo ba thusa ho tseba hore na lihoai tse teng li hlahisa eng, li fumaneha ho kae, hobane batho ba bang ha ba tsebe na ba ka fumana lihlahisoa tse ling kae. O re ke mosebetsing ona moo le baji ba tla una molemo ka ho inoesa ka nkho ho bona se etsahalang mapatlelong a tlhahiso ea lihoai Lesotho.

A bontša ba tla mema mafapha ohle a chang a tšola litabeng tsa temo, e le hore lihoai li tlohe libakeng tse joalo li na le mebaraka, ho arabela sello sa nako e telele sa ho hloka mebaraka.

O re Farmers Pitso e na le mosebetsi e meraro e meholo moo ba nkang maeto a bothuto ho bona lintlafatso le boiphihlelo ba lihoai linaheng tse ling, ho tsoara lithupelo sebakeng sa lihoai le ho li hlabolla ka litaba tsa temo le ho fumana melemo ea ho kena kahar'a temo, ho tsoarela lihoai lipontšuo tsa temo selemo le selemo le ho abela ba ipabolang



tšebetsong likhau.

O re e sa le ba qala ho ba le lipontšuo ba bone pheotoho e kholo mosebetsing oa lihoai tse ngata, kaha lihlahisoa ha li sa lula hobane ba fumane mebaraka le baji ba litšebeletso tsa bona. A re litlaleho tse ling ke hore lihoai li se li na le tumellano ea tšebetso ea ho fepela likhoebobane tse ling ka lihlahisoa tsa bona.

A re selemong sena sa 2023 ba atlehile ho phunyaletsa ho ea mebarakeng

eleng thahasello e kholo ea hore lihlahisoa tsa bona li se ke tsa fella mangoleng, hobane ba na le takatso ea hore ba atlehe ho hlahisetsa naha lijo, le hoja ba e-s'o fihlele seo ba se hlokang ba ntse ba le kahare ho tlhahiso.

A re 'Muso oa Lesotho o ikoalla ka litaba tsa temo leha ba lokela ho sebetseba 'moho le mekhatlo ba e qhelela thoko, ebile o bonahala o etsa tholisano le bona ka ho tsoarela lihoai

lithupelo le ho li hokahanya, ba tloisa babokelli ba lihoai mahlo holimo, 'me sena se ama kholo le ntlafatso ea temo hobane lihoai li sitoa ho tšehetsana.

A re ba sebetseba le lihoai tse ithlokelang tšehetso ho ntlafatsa tlhahiso empa 'muso o thusa lihoai tse sa tsebahaleng, le Lekala la Temo, Kanetso ea Lijo le Phepo e Nepahetseng le bonahala le hulanya maoto ha le lokela ho tšehetsa boikopanyo ba bona e le lihoai.

Nthabeleng Seitlheko

Lihoai li apareloa ke bofuma

Ba hoebi ba bo-mmalitšibana, ba re khoebobane ea bona e putlame, 'me hona ho tlo ba bakela bofuma le ho eketsa litlolo tsa molao kahar'a sechaba, ka lebaka la tlhokahalo ea tlhahiso ea khoho. Tse na li boletsoe ke setho boikopanyong ba barui ba bo-mmalitšibana, Letsatsi Sephepha, puisanong le koranta ka la 20 Tšitoe monongoaha.

O re kamor'a ho isa lengolo a littlelebo ho Tona-Khoho, ho bile le kopano moo ba ileng ba ikeletsa hore ho ntšoe moifo o thehiloeng ka liofisiri tse kholo tsa makala ba ee Naheng ea Eswatini le litho tse tharo tsa boemeli ba bo-mmalitšibana ho etsa boithuto ba hore ba fumana lehe le qhotsisoang ka mechini ka bokae, ho bua ka mekoko le lithole tse behelang 'moho le likhoho tseo ba li hlokang hore li ka fumaneha joang.

Sephepha o re khoebobane

oele kaha ba se na likhoho 'me ha b'a rekisa le khoeling ena eo ho nang le baeti. A re ketso ena e ama bophelo ba nako le nako hobane ba tlo hlolea ho fihlela litlhoko tsa bona tsa mantlha le ho bokella litlhoko tsa bana ba likolo ka lebaka la tlhokahalo ea lichelete.

A re hona joale ho setse bofuma le bofutsana bo tlo bakela 'muso mosebetsi o

mongata 'me ho tla ba le litlolo tse ngata tsa molao. A re nakong ena eo 'muso o koaletseng likhoho le mahe a tsona ho buletsoe nama, ho tla bakela naha tlakotsi ea hore batho ba tšelise likhoho ka likhoroana tsa matsa 'me sefuba seo se tlo ama naha.

A re batho ba ntse ba lata likhoho li kena ka likhoroana tsa matsa, 'me ha 'muso

o bula maliboho lefu lena le tla be le anetse. A re ha e le mona khoeli e le ea bobeli likhoho li koaletsoe, lihoai tse mahareng le tse phameng li ea ameha, kaha ho se na tlhahiso le batho ba neng ba ba sebeletsa ba se ba feletsoe ke mesebetsi.

A re leha mabenkele a maholo a lumeletsoe ho kenya nama ea khoho ho

hlaha Afrika Boroa e litjeo li holimo haholo, 'me bahoebi ba banyenyane ha ba etse liphaello. O re Lekala la Temo le Kanetso ea Lijo le bonahala le sa finolla mafito a sitisang hore ho sebetsehe ka ho bula maliboho, ba bonahala ba sa nkela khoebobane ena hloohong ka hore e bolaea sechaba se sengata, ke boikarabello ba bona ho laola mafu kaha nama e ntse e kena.

H'a phethela o hlalositse hore 'muso ka Lekala la Temo o tle ka moralo, o ka bonang leruo la khoho naheng ena e le tlhoko ea mantlha e ka nolofaletsang le ho hlahisa mesebetsi. O kenyeletse leruo la bo-mmalitšibana e le thahiso ea mesebetsi e tle e be karolo ea potoloho ea chelete e tla fana ka mesebetsi ho baitšokuli le bahoebi.

A re bona e le lihoai ba tlo theha mokhatlo oa naha o tla amana le litaba tsa khoho feela, e le ho thusa hore lentsoe la bona le utloahale, kaha bosieo ba khoho e le tahlehelo ea mesebetsi.






MOB Kidds Edutainment

Puzzle MOB 91-4515

Tlhakantsutsu



Across


- 1 Patuoe ea litaba tsa lebollo (4)
- 7 Pina e khothatsang banna ha ba ea ntoeng (9)
- 10 Liboko tsa Basotho li fetisetsoa baneng ho latela motsoli oa.....(5)
- 11 Basotho ba boroa (7)
- 13 Seletsoa se letsoang haholo ha ho bolotse banana. (6)
- 15 Ea tse ling tseo Basotho ba ikhethollang lichabeng ka eona. (7)
- 16 Basotho ba bophirima (8)
- 17 Basotho ba Leboea (6)
- 18 Tiiso ea manyalo a bosechaba (6)
- 19 Se seng sa liletsoa tsa Basotho (10)
- 21 E 'ngoe ea lihlopha tse 'ne tse kholo tsa batho ba buang puo ea Bantu (2-5)
- 22 Qaleho ea selemo sa Basotho (5)
- 23 Ntoa ea Basotho le Maburu ea 19 Tlhakubele 1858. Ntoa ea..... (7)

Down

- 2 Mofuta oa motjeko oa basali. (7)
- 3 E 'ngoe ea lipapali tsa bana ba Basotho (6)
- 4 Molaoli oa Mabotho a Manyesemane ntoeng ea Tigela (falling) .(5,5,6)
- 5 Molaoli oa Manyesemane ea ileng a hlola ntoang ea Basotho le Manyesemana ka 1852 (6,8)
- 6 Pele ho Bokoloni le Lifaqane, boholo ba sechaba sa Basotho bo ne bo lula sebakeng seo kajeno se bitsoang..... (11)
- 8 Molimo oa Basotho (13)

- 9 Mofuta o mong oa batho o neng o bitsoa Basotho mehleng ea pele (8)
- 12 Ntoa ea Basotho le Manyesemane ea 1852 e bitsoa ntoa ea..... (5)
- 14 Lintoa tsa Foreisetata le Basotho, tse joang hape ka hore ke lintoa tsa(6)
- 18 Lipina tsa thabeng (6)
- 20 Mohato oa ho ruta bana ho kena bophelong ba batho ba baholo. (7)

Likarabo tsa Puzzle MOB 91-4514



Ramaoblata o phethetse leeto la hae la "Ho tsamaea melhaleng ea Ntate Gerard ea Lehlohonolo," Lesotho Parisheng ea Regina Mundi ka la 17 Tšitoe monongoaha.



2023-2024 SELEMO B SONTAHA SA 4 SA ADVENTE

Samuele 7,1-5.8-11.16

Pesalema 88

Ba-Roma 16,25-27

Luka 1,26-38



Khothatso

'Muso oa hae ha o na ho ba le bofelo

Kajeno ha re shebeng phethahatso ea tšepiso ea Molimo ea ho tliša 'Muso oa hae lefatšeng ka Kriste Jesu. Ho latela Thuto ea Pele nakong eo Davida e leng Khosi ea Bajuda Morena o ile a tliša khotso naheng eo, a boela hape a se lokolla lireng tsohle tsa sona. E le ho bontša teboho khosi a ea ho moprofeeta Nathane a bontša hore eena o lula ntlong e ntle empa Morena eena o lula tenteng. Nakong eo ba ntseng ba le tliša lithoriso mohlomong Morena o na lutse hantle tenteng, empa hona joale ba se ba e-na le lehae ka hona Morena o lokeloa ke ho hong ho fetang tente.

Kamor'a ho utloa ngongoreho ena ea khosi Nathane, a re Morena o na le eena ka hona a etse sohle se ka pelong ea hae, e le hore Morena a tle a be le sebaka sechabeng sa hae. Empa bosiu bo tšoanang Morena a etela Nathane 'me a mo roma ho Davida ho 'montša tsohle tseo Morena a mo etselitseng tsona. Ka lipolelo tseo o ne a bontša hore ha ho se motho a ka se etsatsang Morena se mohlolo kaha e le eena ea fanang ka tsohle. Ka ho bona morero o motle oa Davida Morena a mo etsetsa tšepiso ea hore o tla phahamisa lebitso la hae 'me ha ho mang kapa mang ea tla ema kapele ho seo.

A eketsa ka hore o tla mo hlohonolofatsa ka bana, 'me kamor'a lefu la hae litlohlong tsa hae Morena o tla qala 'Muso oa hae. Ho hlake mona hore Morena o bua ka 'Muso oa hae e se oa Davida, ka hona o eketsa hore e tla ba Ntate ho Eena 'me Eena e be Mor'a hae. Mona o ne a bua ka ho ba Ntate ho Kriste 'me eena e ba Mor'a hae. Ha le bala Mangolo a Halalelang hantle sena se etsahalang mona ke phethahatso ea tšepiso ea Morena ea ho boela a tsosa 'Muso oa hae.

Paulosi o le ruta hore Morena o le matlafatsa ka Moea oa 'nete, ka mantsoe a Paulosi o tsebahatsa limisteri tsa hae balumeling ba utloang molaetsa oa Kriste. Tsebo le kutloiso tsona tsa Morena li tsebisitsoe bohle (Balichaba) ka ho ea ka Thato ea Molimo Ntate e le ho tliša bohle ho Morena ka Kriste. Paulosi o bontša hore le lokela ho mamela Kriste hobane pholoho ea Motho e tšile ka eena. Ka Kriste le tla fumana phethahatso ea litšepiso tsohle tse ileng tsa etsetsoa baprofeeta.

Phethahatso ea tseo tsohle e fumanoa karabong e hlakileng Evangeling (Luka 1:26-38) ea kajeno. Morena a romela lenyeloi teropong ea Galilea e bitsoang Nazaretha ho moroetsana ea bitsoang Maria, ea neng a beheletsoe ke Josefa oa ntlo ea Davida. Joaloka motho oa nama le mali Maria o ile a tšoha 'me a makalla tumeliso ea lenyeloi, empa lona la mo khoba matšoafo hore a se tšohe hobane ho khahlile Morena hore a tsoale Mora ea tla bitsoa Jesu. O tla ba moholo haholo 'me o tla bitsoa Mor'a oa ea Holimo-limo. Morena o tla mo fa terone ea ntat'ae Davida, 'me 'muso oa hae ha o na ho ba le bofelo.

Maria o botsa hore na hoo ho tla etsahala joang hobane h'a tsebe monna. Mona o ne a ferekane hobane nakong eo Bajuda ba ne ba se na Morena, joale ho thoe mora enoa o tla nka terone ea Ntata'e Davida. Baprofeeta ba ile ba tšepisa hore Morena o tla romela khosi ea tla busa, ka hona bona ba ne ba nahanne hore e tla busa lefatše. Ke qeto e entsoeng ke bona kaha Morena a sa ka a cho joalo. Lenyeloi la araba hore o tla emola ka matla a Moea o Halalelang, 'me hore a tle a amohele tsona la mo joetsa hore Elizabetha motsoala'e ke moimana oa likhoeli tse tšeletseng.

Maria a ipheha tlasa Thato ea Morena 'me a amohela tsohle joalokaha lenyeloi le boletse, empa joaloka ngoan'a Mojuda o ne a tseba Mangolo hore Morena o ile a lokolla sechaba sa habo bokhobeng a ba tliša lefatšeng la litšepiso.

Le lule le tseba hore Jesu Kriste o teng ka ho lona hohle kaha a thehile 'Muso oa hae lefatšeng ka Letsatsi la Pentakonta. Ka ho nka karalo Sehlabelong se Halalelang sa 'Misa le hopole hore le nka karolo Mokiteng o Moholo o etsahalang Leholimong.

BEKE EA TSOALO EA MORENA

Machokha e khekhelela le Liphakoe

Tšeliso Thakholi

Sehlopha se boemong ba bo-14 Liking e Kholo ea bolo ea maoto Lesotho, Machokha ea Thaba-Bosiu, se bapetse ka mokhekhetho oa 1-1 le sa Liphakoe papaling ea liki, Lebaleng la Setsi sa Thabollo ea Batšoaruo(LCS), Maseru, ka la 16 Tšitoe monongoa-ha.

Liphakoe e bile eona ea pele ho hlaba ntlha metsotsonong e meraro papali e qalile ka leoto la Michael Kanguite, kamor'a neheletsano e ntle ho tloha bohareng ba lebala. Li ile tsa ea khfutsonong e ntse e le 1-0. Kamor'a moo ha li khutla khfutsonong, Machokha e ile ea khutla e se e jele masoko e leng ho ileng hoa tiisa hore e lekanye lintlha.

Liphakoe ha e ea ka ea nyahamisoa ke boemo ba ho lekanngoa ha lintlha,

empa bobeli li ile tsa hlasekana ka matla a maholo, tsa mpa tsa hloloa ho eketsa lintlha. Litlhaselo tsa lihlopha ka bobeli li bile ntle ho fihlela papali e fela.

Puisanong le koranta kamor'a papali, Mokoetlisi oa Liphakoe Monghali Kabelo Tšukulu o itse sehlopha sa hae se nepile moralo oa bona oa ho itokisetsa papali ea bona le Machokha. "Ke ka lebaka lena re hlileng ra hlaba ntlha metsotsonong e meraro feela ea pele ea

papali." A rialo. A re takatso ea bona e ne e le ho hapa papali ena, empa ka lebaka la ho se koetle 'moho, ho bapala ka ho lekana ke tšebetso e kholo haholo.

Potsong ea hore na joale ha sehlopha se ntse se sa ikoetlisi ka lebaka la mathata a khaello ea lithuso tsa lichelete, ba itokisetsa lipapali tsa liki joang? Tšukulu o boletse hore Laboraro la beke e 'ngoe le e 'ngoe, ba bapala papali ea setsoalle e le ho ithophela lipapali tsa

bona tsa liki. "Empa haele papaling ena re tile ho eona re sa ka ra ba le papali Laboraro, empa re atlehile ho e laola, le hoja ba ne ba bonahala ba ka 'na ba re hlola". O boletse joalo.

A tsoelapele hore seo ba ileng ba se etsa ke ho lokisa bahlankana ka likelelong hore le tlasa boemo bona bo hloabaetsang, ba etse mosebetsi oa bona ka boitelo le lerato.

A tiisa hore boemo bona ba hore ba ntse ba e-s'o fumane botšehetsi bo ba rahile maling a mpa habohloko, kaha bo khinne kholo le tsoelopele ea sehlopha. A ipiletsa ho bahoebi ho etsa letsoho la monna. A qetella ka hore morero e ne e le hore ha mokhahlelo oa pele oa liki o fela ba be ba bokelelitse lintlha tse 18 ho isa ho 20, empa hajoale ba na le tse 14 feela, e leng se bontšang hore ba ntse ba le kahar'a meoloane eo ba ipehetseng eona. A re takatso ea hae ke ho fihlisa sehlopha sena kahar'a tse robeli tse ka holimo ha liki e fela, ba le boemong ba bosupa kapa ba borobeli.

Liphakoe e saletsoe ke lihlopha tse tharo, e leng Lijabatho, Limkokwing le Bantu, pele e phethela mokhahlelo ona oa pele oa Liki e Kholo.



FIA e tlotla Sekhoane

Tšeliso Thakholi

Mothehi oa Mokhatlo oa Basali ba Afrika Lesotho (FIA), Mofumahali Ntahi Griffiths o ipilelitse ho bacha ho nka mohlala o motle oa ho ipabola ka litalenta tsa bona, joaloka sethibathibane sa Sehlopha sa Naha Sekhoane Moerane. Tsena o li buile nakong eo a neng a nehelana ka limpho ho khallala ena ea bolo ea maoto, Lebaleng la Swallows, Mazenod, ka la 16 Tšitoe 2023.

Griffiths o supile hore ka ho ipabola ka talenta ea hae ea papali ea bolo ea maoto e le sethibathibane sa naha le sa sehlopha sa Liki e Kholo sa LMPS, o sietse bana ba tlang kamorao ho eena mohlala oa hore ba sebetse hantle le bona ba tle ke ba tlotloe. A leboha le ho thoholetsa Moerane ka mosebetsi o motle oo a ntseng a o etsa, e le letsoalloa la Mazenod kaha tsena tsohle h'a li etsetse eena feela empa o li etsetsa le sechaba sa habo.

A re ba ithutile hore ba

bangata bana ba Mazenod, ba ntseng ba ipabola ka litalenta tsa bona tse ngata tse kenyeletsang har'a tseling, mabelo, 'mino le Taekwondo, empa kaha e sa ntse e le mokhatlo o mocha o ntseng o hola, ba lakalitse ho qala pele ka Moerane, 'me ho tloha mona ba tla lula fatše ba ipuo hore na isao ba leba ho kae. A leboha bohle ba bileng teng ho tla tlotlisa litšebetso tsena.

President ea Swallows, Monghali Nkhahle Nkhahle o lebohile FIA ka hore ebe e bone tšebetso e tsoileng matsoho ea sebakali sena sa naha, 'me ba mo lebohela. A re joaloka sebakali se tsoang Sehlopheng sa Swallows, ba motlotlo haholo ke tšebetso ea hae e babatsehlang. "Rea thaba, haele mona lona bo-'m'e le ntse le bona mesebetsi eo sehlopha sa lona se ntseng se e etsa, ea ho hlalisa likakapa tse kang mohlankana enoa. O re entse hore re be motlotlo, 'me sena se tla etsa hore le bana ba tlang kamorao, ba tle ba khalle hore le bona ba sebetse ka thata ka litalenta tsa bona. Le uena u se ke be oa hopola hore u se u fihlile moo u

eang teng. Tsela ena e sa le telele kapele ho uena. Re u lakaletsa katleho le mahlohonolo." Ke Nkhahle eo.

Lebitsong la motsoali, 'Maselloane Letsoela o lebohile le ho lebohela khallala ena ka limpho tseo a li filoeng ke FIA ho tsoa botebong ba lipelo tsa bona. A leboha ka ho khetholoha litichere tse ileng tsa otlala ho noesetsa talenta ea kha-

lala ena, 'moho le Sehlopha sa Bolo sa Swallows kaha e le hona moo a qalileng ho ipabola hona teng. A hlokomelisa Sekhoane hore limpho tseo a ntseng a li fuoa ka lebaka la mosebetsi oa hae o motle, li se ke be tsa mo mathela hloohong empa ebe motho ea nang le boikokobetso le ho beha Morena Molimo pele linthong tsohle. "Kamehla ha lintho li u etsahalla, leboha Molimo."

H'a leboha, o itse seo a

se etselitsong ke tlotla e kholo ho eena, 'me se mo tlatsetse ka morolo. A tiisa hore e boetse ke thuto ho bana ba banyenyane le lithaka tsa hae hore kamehla ha ba ka sebetse ka thata ho na le tse ntle tseo ba tla li kotula bophelong ba bona. A phethela ka hore sena ke lehlohonolo le lehlo, kaha e le eena oa pele eo sena se qalang ho etsahala ka eena. Ka hona a leboha bohle ba atlehisitseng tšebetso ena.



LBA e khutlisetsa sechabeng

Tšelisiso Thakholi

Mokhatlo oa Lesotho oa Papali ea Basketball (LBA) o ile oa hlophisa litlholisano tsa matsatsi a mabeli tsa Mohope oa LBA Summer Slam Charity Cup, ka sepheo sa ho khutlisetsa sechabeng ka ho fana ka mesangoana ea bohloeki ho basali ba hlohang, liaparo le lijo baneng ba Lehac la Likhutsana le tlang ho khethoa ke mokhatlo. Litlholisano tse na li bile Lehakoe, Maseru, ka la 16 ho isa

la 17 Tšitsoe monongoaha.

Puisanong le koranta, Motlatsi oa President ea LBA, Monghali Retšelisitsoe Mosaase o boletse hore litlholisano tse na ke tse kolang selemo, tseo ho tsona libapali li nonyanang matla ho ikutloa hore na li matla ha kae papaling ea Basketball selemong sena. A re LBA e ile ea ikeletsa hore ka litlholisano tse na ebe tseo ho tsona ho bokeletsoang limpho tse fapakaneng ho tsoa ho barati ba papali ea Basketball ho tla fana ka tsona ho batho ba hlohang.

A re limpho tseo, li kenyeletsang hara tse ling mesangoana ea bohloeki, lijo le liaparo. A tiisa hore katleho e kholo eo ba e fihletseng le



barati ba Papali ea Basketball ke kutloisiso e teng ea ho fana. "Bafani ba tile ka

bongata bo boholo, e leng hore taba ena ea ho fana ke eona eo re boneng e hola selemong sena." O boletse joalo a bile a eketsa ka hore ba buseletsa ho Basotho ka lebaka la lerato la bona ho papali ea Basketball.

A phethela ka hore lenane la lihlopha tse neng li kenetse litlholisano tse na, ha li'a ba ngata joaloka selemong se fetileng kaha Basketball e ile ea eba le khofu ea nako e telele haholo botsamaising, 'me ke hona ho qetoang ho khethoa Komiti e Kholo e ncha. A re Basotho ba khobe matšoafu liqholotso tse neng li aparetse papali ena li sa ile moriting. "Lekhetlong lena re khutlile ka matla a maholo." Ke Mosaase eo.

Ho ea ka e mong oa bafani, Tšepiso Sesiua o tše-

hetsa papali ea Basketball hobane ba rata ho e tso-solosa kamora ho khafutsa nako e telele ka lebaka la likhula-khulano tse bileng teng, tse batlileng li beha papali ena ka moo thakali e fatelang. A re ba tšehetsa papali ea Basketball feela hobane ba e rata, 'me ba tla e rata ka linako tsohle.

Ke lihlopha tse tšeletseng tse neng li kenetse litlholisano tse na, e leng tse 'ne tsa banna e leng KTA Allstars, Lerotholi Polytechnic (LP), BKM Rebels le sa baeti sa Cross Boarder Syndicate (CBS) ho tsoa Naheng ea Afrika Boroa. Ha tsa basali e bile LP le BKM Sharks. Mohloli ka ho banna e bile CBS e ileng ea thoba ka khaka ho leba Afrika Boroa, ha ka ho basali LP e bile eona mohloli.



Lijabatho Ladies e bontša boiphihlelo

Tšelisiso Thakholi

Sehlopha sa Bolo ea Maoto sa Basali, Lijabatho Ladies seo e saleng se hula ntoa ka litlhako tsa morao ka lebaka la ho bapala ka libapali tse robeli, ho tloha ha Liki e Kholo e qala se bontšitse boiphihlelo papaling ea bolo ka ho tlohlolla Thaba-Tseka Ladies, ka thupa ea 3-1, papaling e bileng matla e phethelang lipapali tsa liki le phomolo ea Keresemese le selemo se secha, e neng e bapalloa Bambatha,

Maseru ka la 16 Tšitsoe monongoaha.

Ka ho hapa papali ena se ntlafalitse maemo a sona litlholisanong tsa Mohope oa Lesotho oa Women's Super League. Ha joale e nyolohetse boemong ba borobong, 'me e bapetse lipa-

pali tse robeli. Ka hona e na le lintlha-kholo tse tharo.

Haele lipapali tse ling tse bapetsoeng hona ka la 16 Tšitsoe monongoaha, ke moo Berea Ladies e ileng ea khakhatha ntle ho qenehelo Mawes Ladies ka phafa ea 3-0. Athe Sekolo se Pha-



hameng sa Mphaki ho hlahisa Seterekeng sa Quthing se ile sa bapala ka seahlolo sa 1-1 le Bantu Ladies.

Ho sa le joalo, lipapali li ea phomolong tjena sehlopha se ntseng se le ka holimo lokong e le bompoli ba selemo le selemo ke LDF

Ladies, bobeling ke Kick-4Life Ladies, borarong ke sehlopha se secha se sa tsoa kena Liking e Kholo sa Mphaki H.S, ha boneng e le Bantu Ladies. Ka qetellong ke Mawes Ladies e ka 'na ea rathoa ke selepe ha selemo sa lipapali se fela isao.